

Program Produktif Propaz Sebagai Langkah Mengurangkan Kemiskinan Di Negara Brunei Darussalam

Rakinah @ Maimunah Binti Haji Masri
Calon Sarjana Pengurusan Pembangunan Islam,
Fakulti Pengurusan Pembangunan Islam,
Universiti Islam Sultan Sharif Ali (UNISSA)
e-nah203@hotmail.com

Vol.4, Issue 2 | July 2021

KATA KUNCI

kemiskinan, zakat produktif dan PROPAZ

ABSTRAK

Melalui zakat, hak orang miskin, orang miskin dijunjung dan ditolong. Oleh itu, selain daripada zakat yang bersifat konsumtif, ia juga diaktifkan melalui zakat yang produktif iaitu menambah atau sebagai modal teroka. Majlis Ugama Islam sebagai pengurus zakat Negara Brunei Darussalam telah berusaha mempelbagaikan langkah-langkah bantuan untuk membantu golongan asnaf yang memerlukan terutama golongan miskin. Selain mengagihkan dana zakat secara habis-habisan, MUIB juga mengadakan program baru sebagai kaedah pengedaran produktif yang disebut PROPAZ. PROPAZ diperkenalkan sebagai sebahagian daripada kaedah pengagihan yang diharapkan untuk mengurangkan kemiskinan di Negara Brunei Darussalam. Penelitian ini adalah bertujuan untuk mengetahui sejauh mana Program Pemberdayaan Zakat Asnaf (PROPAZ) dapat membantu asnaf dalam membasmi kemiskinan. Di samping memperkenalkan lebih banyak mengenai tujuan program serta jenis aktiviti yang ditawarkan untuk membantu para peserta. Penelitian ini adalah berbentuk kualitatif, yang mengutamakan kepada proses dan persepsi yang dilakukan serta mengungkap pelbagai maklumat dengan mendeskripsi dan menganalisis. Hasil penelitian menunjukkan bahawa program ini memperlihatkan perlbagai hasil kejayaan dari tahun ke setahun sehingga kini. PROPAZ mampu bergerak lebih maju dan menghasilkan peserta yang berkemahiran serta mampu mengeluarkan mereka dari kepompong kemiskinan.

KEYWORDS

poverty, zakat productive and PROPAZ

ABSTRACT

Through zakat, the rights of the poor are upheld and helped. Therefore, apart from consumptive zakat, it is also activated through productive zakat, adding or as a venture capital. The Islamic Religious Council as Manager of Zakat Brunei Darussalam has tried to diversify the help measures the needy asnaf, especially the poor. In addition to distributing zakat funds, MUIB also holds new programs as a productive distribution method called PROPAZ. PROPAZ was introduced as part of the distribution method that is expected to reduce poverty in Brunei Darussalam. This study aims to determine the extent to which the Asnaf Zakat Empowerment Program (PROPAZ) can help asnaf in eradicating poverty. In addition to introducing more about the purpose of the program as well as the types of activities offered to assist participants. This research is qualitative, which prioritizes the process and perception performed and discovering various information by describing and analyzing. The results show that this program shows a lot of success from year to

year until now. PROPAZ is able to move forward and produce skilled participants as well as able to lift them out of the cocoon of poverty.

Pendahuluan

Kemiskinan merupakan masalah besar yang wujud sejak sekian lama dan mempunyai implikasi besar dalam kehidupan. Islam memberikan penekanan yang besar untuk membebaskan orang miskin dan kaum yang lemah dari kepompong kemiskinan. Hakikatnya, Islam juga merupakan agama yang pertama memperkenalkan serta mempraktikkan sistem perpaduan, kesejahteraan dan keseimbangan masyarakat secara praktikal apabila mewajibkan harta yang cukup haul dan nisab untuk dikeluarkan zakat.¹ Perkara ini membawa maksud bahawa harta yang terkumpul melalui zakat adalah bertujuan untuk mencapai kesejahteraan ummah. Allah Subhanahu Wa Ta'ala berfirman:

مَنْ عَمِلَ صَالِحًا مِّنْ ذَكَرٍ أَوْ أَنَّىٰ وَهُوَ مُؤْمِنٌ
فَلَنُحْيِيَنَّهٗ حَيٰوةً طَيِّبَةً وَلَنَجْزِيَنَّهُمْ أَجْرَهُمْ بِأَحْسَنِ
مَا كَانُوا يَعْمَلُونَ ﴿٧٧﴾

*Sesiapa yang beramal soleh dari lelaki atau perempuan sedang ia beriman, maka sesungguhnya Kami akan menghidupkan dia dengan kehidupan yang baik dan sesungguhnya Kami akan membalas mereka dengan memberikan pahala yang lebih dari apa yang mereka telah kerjakan.*²

Allah Subhanahu Wa Ta'ala juga berfirman;

فَلْيَعْبُدُوا رَبَّ هٰذَا الْبَيْتِ ﴿١٠٧﴾
الَّذِي أَطَعْتَهُم مِّنْ جُوعٍ وَعَآمَنَهُمْ مِّنْ خَوْفٍ ﴿١٠٨﴾

*Maka hendaklah mereka menyembah Tuhan Yang Menguasai Rumah (Kaabah) ini, Tuhan Yang memberi mereka penghidupan, menyelamatkan mereka dari kelaparan dan mengamankan mereka dari ketakutan.*³

Firman Allah Subhanahu Wa Ta'ala, yang disebutkan di atas menerangkan mengenai beberapa ciri kesejahteraan ummah. Dr Abdul Nasir, menjelaskan bahawa kesejahteraan bermaksud membantu meningkatkan taraf hidup yang lebih baik, mencapai kemenangan dan kejayaan, memberi kesenangan

dan mengurangkan penderitaan, memperoleh keberkatan dan kemakmuran, menjaga iklim cinta dan kasih sayang serta menghilangkan rasa lapar dan ketakutan.⁴

Kesejahteraan boleh dicapai melalui zakat sekiranya masyarakat Islam mengamalkan dan mematuhi sistem Islam. Oleh itu, masalah kemiskinan akan dapat diselesaikan dengan berkesan. Zakat mempunyai peranan besar dalam masyarakat Islam yang merangkumi pelbagai aspek seperti ekonomi, sosial, perundangan, pendidikan dan sebagainya. Mohamed Yusoff, menjelaskan bahawa zakat memberi kesan positif dalam pertumbuhan ekonomi yang berfungsi sebagai salah satu alat fiskal ekonomi yang berkesan.⁵ Perkara ini dipersetujui oleh ahli ekonomi bahawa zakat adalah sumber utama untuk menjaga kebajikan dalam pertumbuhan serta pembangunan ekonomi sesebuah negara.⁶ Zakat wajib diagihkan kepada golongan tertentu yang memerlukan, sebagaimana telah dinyatakan dalam Al-Quran iaitu kepada lapan golongan yang memenuhi syarat.

Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Sultan Dan Yang Di Pertuan Negara Brunei Darussalam sangat mengambil berat dengan serius mengenai masalah kemiskinan ini melalui titah-titah baginda, antaranya;

"... Semenjak negara mencapai kemerdekaannya, pendapatan per kapita penduduk adalah memberangsangkan. Sepuluh tahun selepas merdeka ianya terus meningkat. Ini tidak diragukan lagi, dengan sendirinya menyumbang kepada peningkatan taraf hidup dan kesejahteraan rakyat... .. Bertolak dari sini, sepatutnya, kadar kemiskinan dengan sendirinya adalah menurun. Maka berdasarkan ini, apakah tidak terlintas diingatan kita untuk menetapkan salah satu matlamat Wawasan

¹ Al-Masri. Abdul Sami'. (t.t). Nazrat fi al-iqtisad al-islami. Kaherah: Dar al-Tiba'ah wa al-Nashr al-Islamiyyah. Hlm: 21.

² An Nahl, 16:97.

³ Quraisy, 106:3-4.

⁴ Dr. Abdul Nasir bin Haji Abdul Rani.(2012).*Wacana Pemangkin Ekonomi Ummah*. Brunei Darussalam:Perpustakaan Dewan Bahasa dan Pustaka Brunei. Hlm:63.

⁵ Yusoff, Mohammed. (2011). *Zakat expenditure, school enrollment, and economic growth in Malaysia*. International Journal of Business and Social Science, 2(6), Hlm:175-181.

⁶ Iqbal M. Khan (2014). Vocational Education and Zakat: *The Case Study of Punjab Vocational Training Council*. Journal of Higher Education and Science, 4(2).

ialah, untuk menjadikan kadar kemiskinan di negara ini ke tahap sifar? ...”⁷

”Dari sudut ugama, manakala terdapat keadaan yang menggalakkan, maka kemiskinan dikalangan umat Islam tidaklah sukar untuk diatasi. Pada hari ini kita bercakap mengenai hijrah, dan sekiranya umat Islam berjaya keluar daripada kepompong kemiskinan, maka bermakna inilah hijrah yang paling bersejarah untuk mereka.” titah baginda lagi.

Baginda juga bertitah:

“... Masalah kemasyarakatan yang sering disebut-sebut, khasnya oleh media-media massa ialah masalah kemiskinan. Agensi-agensi yang berkaitan telah turut menangani masalah ini dengan program-program mereka yang bermacam-macam, dengan fokus yang sama, iaitu mahu meringankan beban kemiskinan tersebut. Pada hemat beta, masalah kemiskinan di negara ini belumlah separah di tempat-tempat lain di luar negara. Ia mungkin dapat dikendalikan dengan lebih efektif melalui kaedah-kaedah praktikal yang bersesuaian dengan keadaan di negara ini. Cuma saja barangkali, kita ini belum lagi menemukan atau belum mahu mencuba kaedah-kaedah tersebut...”⁸

Negara Brunei Darussalam bersama agensi kerajaan, swasta dan NGO berusaha untuk membasmi kemiskinan untuk memperkukuhkan kemampuan masyarakat untuk berdikari dan kemudian menjana kehidupan yang lebih baik. Usaha ini bertujuan untuk mengurangkan kadar kemiskinan negara melalui pelbagai bentuk bantuan dan sesuai dengan keadaan semasa.

Majlis Ugama Islam melalui Bahagian Kutipan dan Agihan Zakat telah menetapkan kaedah-kaedah pengagihan zakat sebagai pentadbir zakat di Negara Brunei Darussalam. Kaedah pengagihan zakat yang ditetapkan adalah seperti pengagihan dalam bentuk tunai dan pengagihan dalam bentuk material. Selain itu, Majlis ugama Islam telah mengambil inisiatif dengan memperluaskan lagi kaedah pengagihan

zakat kepada pengagihan secara produktif yang dikenali sebagai Program Pengupayaan Asnaf Zakat atau PROPAZ. Program ini adalah kerjasama yang melibatkan Majlis Ugama Islam bersama agensi kerajaan, swasta dan juga NGO.

Objektif

Zakat dapat memenuhi keperluan orang yang memerlukan, mengurangkan jurang ekonomi dan jumlah masalah sosial serta mengekalkan daya beli masyarakat untuk mengekalkan sektor perniagaan. Pada masa yang sama dapat meningkatkan taraf hidup orang yang masih berada di bawah garis kemiskinan. Dana zakat boleh digunakan untuk tujuan penggunaan dan produktif. Pengurus zakat perlu memperbaiki atau meningkatkan peranan mereka terutama dalam penggunaan dan pengagihan zakat. Majlis Agama Islam telah memperkenalkan dan melaksanakan kaedah pengagihan zakat kepada pengagihan produktif yang dikenali sebagai Program Pengupayaan Asnaf Zakat atau PROPAZ. Tujuan utama kajian ini adalah untuk mengetahui sejauh mana Program Pemberdayaan Zakat Asnaf (PROPAZ) dapat membantu asnaf dalam membasmi kemiskinan. Di samping memperkenalkan lebih banyak mengenai tujuan program serta jenis aktiviti yang ditawarkan untuk membantu para peserta. Kajian ini juga menyelitkan mengenai cara Majlis Ugama Islam Brunei menentukan garis panduan asnaf yang memerlukan bantuan, ini adalah kerana Negara Brunei Darussalam belum mempunyai garis kemiskinan.

Tinjauan Umum Zakat Produktif

Terdapat beberapa penulisan yang mengkaji mengenai zakat serta peranannya dalam meningkatkan pertumbuhan ekonomi dan kesejahteraan sosial negara melalui pendayaan zakat. Malah terdapat juga penulis yang membahaskan mengenai pentingnya zakat produktif ini dilakukan, antaranya;

Ataul-Haq berpendapat bahawa zakat berperanan dalam meningkatkan taraf hidup umat Islam yang dapat meningkatkan pendapatan dan membasmi kemiskinan serta mengurangkan jurang antara kaya dan miskin. Projek yang dibiayai dari menggunakan dana zakat dalam bidang pendidikan, kesihatan, dan kesejahteraan sosial berpotensi besar untuk meningkatkan produktiviti golongan miskin.⁹ Kajian Mohammed Yusoff mendapati bahawa zakat berpotensi menjadi instrumen dasar fiskal utama dalam ekonomi negara-negara Islam kerana zakat berfungsi sebagai penstabil semulajadi terutama

⁷ [Titah Kebawah Duli Yang Maha Mulia Paduka Seri Baginda Sultan Haji Hassanah Bolkhiah Mu'izzaddin Waddaulah, Sultan Dan Yang Di Pertuan Negara Brunei Darussalam sempena Pembukaan Persidangan Musim Permesyuaratan Ke-4 Majlis Mesyuarat Negara pada 26hb Safar 1429 / 04hb Mac 2008.]

⁸ [Titah Kebawah Duli Yang Maha Mulia Paduka Seri Baginda Sultan Haji Hassanah Bolkhiah Mu'izzaddin Waddaulah, Sultan Dan Yang Di-Pertuan Negara Brunei Darussalam Sempena Majlis Sambutan Hari Raya Aidilfitri 1429 Hijrah / 2008 Masihi Anjuran Yayasan Sultan Haji Hassanah Bolkhiah Pada Hari Isnin 12 Syawal 1429 / 13 Oktober 2008]

⁹ Ataul-Haq, Pramanik. (1993). *Development and Distribution in Islam* Petaling Jaya: Pelanduk Publications.

ketika negara menghadapi kemerosotan ekonomi, kutipan zakat berkurang secara automatik. Dengan adanya zakat, ia dapat menyelesaikan masalah golongan miskin. Zakat juga berperanan dalam meningkatkan usaha yang produktif sehingga dapat membantu pendapatan golongan ini. Malahan zakat dapat membantu negara dalam mengurangkan masalah pengangguran.¹⁰

Yusuf Qardhawi berpendapat bahawa membayar zakat termasuk ibadah sosial untuk membantu orang miskin dan ekonomi lemah untuk meningkatkan ekonomi mereka sehingga mereka mampu berdiri sendiri di masa depan dan tekun mempertahankan kewajiban kepada Allah Subhanahu Wa Taala.¹¹ Pembahagian zakat secara produktif pernah berlaku pada zaman Rasulullah Salallahu 'Alaihi Wassalam di mana baginda memberikan harta zakat untuk digunakan sahabatnya sebagai modal usaha. Sebagaimana yang disebutkan oleh Penulis Didin Hafiduddin¹² yang berpendapat dengan hadits yang diriwayatkan oleh riwayat Imam Muslim, "Dari Salim bin Abdullah bin 'Umar dari bapanya (Umar bin Khatib) bahawa Rasulullah Salallahu 'Alaihi Wassalam pernah memberikan Umar bin Khatib suatu pemberian, lalu Umar berkata : "Berikanlah kepada orang yang lebih fakir dari saya, Nabi bersabda "Ambilah dahulu, setelah itu milikilah (berdayakanlah) dan sedekahkan kepada orang lain dan apa yang datang kepadamu dari harta seperti ini, sedangkan engkau tidak memerlukannya dan bukan engkau minta, maka ambillah. Dan mana yang tidak demikian maka janganlah engkau turutkan nafsumu." hadith riwayat Muslim.¹³ Hadith ini menyebutkan bahawa pemberian harta zakat dapat diberdayakan atau diproduktifkan.

K.H A Safradii mengatakan bahawa pengagihan zakat secara produktif adalah salah satu usaha untuk meningkatkan kesejahteraan masyarakat. Oleh itu, kedua-dua zakat konsumtif produktif perlu dilaksanakan pada *mustahiq* (penerima zakat) agar usaha dapat berjalan dengan baik sesuai dengan apa yang telah disyariatkan. Zakat yang diberikan kepada masyarakat umumnya bersifat konsumtif iaitu untuk memenuhi keperluan harian kepada mereka yang tidak mampu dan sangat memerlukannya. Namun hal tersebut kurang membantu masyarakat untuk jangka panjang. Dengan demikian, wang atau keperluan harian yang diberikan akan cepat habis dan mereka akan kembali hidup dalam keadaan fakir dan miskin. K.H A Safradii menjelaskan bahawa salah

satu tujuan disyariatkan zakat adalah untuk meningkatkan kesejahteraan masyarakat terutamanya para *du'afa* (lemah), baik dari segi moral dan material.¹⁴ Ade Mulyna menyatakan bahawa pengagihan zakat tidak cukup hanya dengan memberikan keperluan asasi sahaja, pemberian zakat produktif untuk modal usaha adalah lebih baik kerana ia akan menjadikan sebagai mata pencarian yang akan dapat mengangkat keadaan ekonomi mereka. Perkara ini diharapkan mereka beransur keluar dari kemiskinan.¹⁵ Justeru itu, selain zakat yang bersifat konsumtif, ianya juga diupayakan melalui zakat yang produktif iaitu menambah atau sebagai modal usaha.

Zakat secara epistemologi berasal dari kata Zakah dari bahasa arab yang bermaksud membersihkan, bertumbuh dan berkah.¹⁶ Selain itu zakat juga memiliki makna bertambah.¹⁷ Manakala perkataan produktif itu berasal dari bahasa inggris "produktive" bermaksud menghasilkan atau memberikan banyak hasil.¹⁸ Asnaini menjelaskan bahawa makna produktif lebih merujuk kepada kata sifat dan secara amnya kaedah produktif menghasilkan banyak kerja. Oleh itu, zakat yang produktif dapat difahami sebagai kaedah mengagihkan dana zakat kepada sekumpulan penerima zakat (*mustahiq*) yang dapat membuat mereka menghasilkan sesuatu secara berterusan dengan dana zakat yang mereka terima.¹⁹ Dengan memberikan zakat yang produktif, kumpulan penerima zakat (*mustahiq*) dapat mengembangkan dan menggunakan perniagaan mereka agar dapat memenuhi keperluan harian mereka yang berterusan. Maka dapat disimpulkan bahawa zakat produktif adalah pemberian zakat yang dapat membuat para penerima menghasilkan sesuatu secara berterusan dengan harta zakat yang mereka terima dan kemudian dikembangkan untuk memenuhi keperluan hidup mereka untuk masa depan. Oleh itu, zakat produktif adalah zakat harta atau dana zakat yang diberikan kepada penerima zakat tidak dihabiskan, akan tetapi dikembangkan dan digunakan untuk membantu usaha mereka, sehingga dengan usaha tersebut mereka dapat memenuhi keperluan hidup secara berterusan. Untuk mewujudkan pendayaan zakat dengan baik,

¹⁰ Yusoff, Mohammed. (2011). *Zakat expenditure, school enrollment, and economic growth in Malaysia*. International Journal of Business and Social Science, 2(6), 175-181.

¹¹ Yusuf Qardhawi. (1966). *Musykilah al-Faqr Wakaifa Aalajaha Al Islam*. Beirut. Hlm:127.

¹² Didin Hafidhuddin. (2002). *Zakat Dalam Perekonomian Modern*. Jakarta: Gema Insani. Hlm:149.

¹³ Ibnu Hajar al-'Asqalani, Bulughul Maram, (t.t). Damaskus: Imaratullah. Hlm. 137

¹⁴ K.H A Safradii. (2018). *Zakat Konsumtif dan Zakat Produktif Analisis Fikih Kontemporer*. Hlm:61

¹⁵ Ade Mulyna. (2020). *Strategi Pendayagunaan Zakat Produktif*. Indonesia. UIN Sultan Maulana Hasanuddin Banten. Hlm:3.

¹⁶ Amir Syarifudin. (2003). *Garis-garis Besar Fiqih*. Jakarta: Kencana. Hlm:38.

¹⁷ M. Ali Hasan. (2008) *Zakat dan Infak: Salah Satu Solusi Mengatasi Problema Sosial di Indonesia*. Jakarta: Kencana. Hlm:14.

¹⁸ Joyce M. Hawkins. (1996) *Kamus Dwi Bahasa Inggris Indonesia, Indonesia-Inggris*, Exford: Erlangga. Hlm:267.

¹⁹ Asnaini. (2008). *Zakat Produktif Dalam Perspektif Hukum Islam*. Yogyakarta: Pustaka Pelajar. Hlm:63.

peranan kerajaan serta institusi pengurusan zakat adalah sangat diperlukan.

Usaha untuk mencapai tujuan ini, pengagihan zakat tidak mencukupi jika hanya menyediakan keperluan yang bersifat konsumtif, pengagihan zakat secara produktif untuk modal usaha akan lebih bermakna, sehingga diharapkan para penerima akan dapat meningkatkan taraf kehidupan menjadi lebih baik dan mencapai segala keperluan.

Metodologi Kajian

Kajian ini adalah kajian kualitatif, iaitu kajian yang mengutamakan kepada proses dan persepsi di mana kajian yang dilakukan dapat mengungkap pelbagai maklumat kualitatif dengan mendeskripsikan dan menganalisis maklumat tersebut secara cermat dan penuh makna, di samping tidak menepikan maklumat bersifat kuantitatif yang berbentuk angka-angka.²⁰ Pendekatan kualitatif dipilih kerana dengan menggunakan pendekatan ini, pengkaji dapat menginterpretasi data dengan cara memberikan makna, menerjemahkan, dan menjadikan hasil interpretasi itu sebagai data. Oleh yang demikian, pengkaji memiliki ruang untuk menginterpretasi data-data yang diperoleh secara deskriptif bagi menjawab permasalahan dalam kajian ini. Untuk mencapai objektif, kajian ini dijalankan menggunakan kaedah kualitatif yang berbentuk kajian perpustakaan dengan mengambil maklumat serta rujukan daripada data-data sekunder seperti; jurnal, artikel-artikel, buku dan juga laman sesawang pengurusan zakat di Brunei Darussalam serta laman sesawang lain berkaitan zakat.

Dapatan Kajian

Negara Brunei Darussalam belum mempunyai garis kemiskinan yang rasmi '*official poverty line*'.²¹ Yang Di-Pertua Majlis Kesejahteraan Masyarakat (MKM), Datin Paduka Dayang Hajah Intan binti Haji Mohd. Kassim berpendapat bahawa data mengenai tahap kemiskinan di negara ini kurang '*reliable*' (dipercayai) kerana hanya berdasarkan kepada bilangan mereka yang menerima bantuan kerajaan.²²

²⁰ Noeng Muhadjir. (1996). *Metodologi Penelitian Kualitatif, edisi III*. Yogyakarta:Rakesarasin. Hlm:159.

²¹ Yang Di-Pertua Majlis Kesejahteraan Masyarakat (MKM), Datin Paduka Dayang Hajah Intan binti Haji Mohd. Kassim berpendapat bahawa data mengenai tahap kemiskinan di negara ini kurang '*reliable*' (dipercayai) kerana hanya berdasarkan kepada bilangan mereka yang menerima bantuan kerajaan.

²² Pelita Brunei. "*Penyelidikan Komprehensif garis kemiskinan perlu dilaksanakan*" (penulis: Wan

Jabatan Perancangan dan Kemajuan Ekonomi telah membuat kajian serta laporan yang dikenali sebagai Kos Minimum Keperluan Asas (KMKA) yang mana boleh digunakan sebagai sumber bahan rujukan serta garis panduan Majlis Ugama Islam.²³ Walaubagaimanapun, Kos Minimum Keperluan Asas (KMKA) bukan garis kemiskinan yang rasmi bagi Negara Brunei Darussalam.

Kebawah Duli Yang Maha Mulia bertitah;

"Pada hemat beta, masalah kemiskinan di negara ini belumlah separah di tempat-tempat lain di luar negara. Ia mungkin dapat dikendalikan dengan lebih efektif melalui kaedah-kaedah praktikal yang bersesuaian dengan keadaan di negara ini..."²⁴

Majlis Ugama Islam adalah salah sebuah pertubuhan yang tertinggi di Negara Brunei Darussalam yang merupakan pembuat dasar untuk menentukan hala tuju pentadbiran Ugama Islam negara.²⁵ Pengurusan zakat di Negara Brunei Darussalam adalah berdasarkan hukum Syariat Islam dan diagihkan kepada orang yang berhak seperti yang disebutkan di dalam Al-Quran. Disebabkan Negara Brunei Darussalam belum mempunyai garis kemiskinan yang rasmi hanya KMKA digunakan untuk rujukan dalam pengagihan zakat, Majlis Ugama Islam Brunei secara amnya menetapkan bahawa agihan-agihan zakat yang diberikan merangkumi tiga objektif, iaitu:²⁶ Keselamatan Sosial, Pembangunan Ekonomi dan Pembangunan Insan.

Berperanan sebagai pengurus zakat negara, Majlis Ugama Islam telah menyenaraikan beberapa faktor/ciri/keadaan asnaf fakir dan miskin yang dibolehkan menerima agihan zakat antaranya seperti berikut;²⁷

- i) Tidak ada pendapatan, Pendapatan tidak mencukupi dan tanggungan ramai.

Mohammad Sahran Wan Ahmadi) 12 November 2015.

²³ Hartina Binti Haji Mohd Ariffin. Pegawai Tugas-Tugas Khas, Ketua Unit Perancangan dan Penyelidikan,BAKAZ. (2020 November 14). Temubual Kajian.

²⁴ [Titah Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Sultan Dan Yang Di-Pertuan Negara Brunei Darussalam Sempena Majlis Sambutan Hari Raya Aidilfitri 1429 Hijrah / 2008 Masihi Anjuran Yayasan Sultan Haji Hassanal Bolkiah Pada Hari Isnin 12 Syawal 1429 / 13 Oktober 2008]

²⁵ Majlis Ugama Islam. (2019). *Taklimat Mengenai Dengan Pengurusan dan Pentadbiran Zakat dan Wakaf di Negara Brunei Darussalam*.

²⁶ Pelita Brunei. "*Tingkatkan taraf hidup, jangan bergantung sepenuhnya kepada zakat*" sempena Majlis Muzakarah Kementerian Hal Ehwal Ugama(KHEU) 31 Januari 2015.

²⁷ Ibid.

- ii) Umur yang sudah lanjut, tidak mampu berusaha dan tidak ada yang menanggung nafkahnya.
- iii) Sakit atau cacat, tidak mampu berusaha dan tidak ada sesiapa yang diharapkan untuk membantu.
- iv) Balu, tidak ada sesiapa yang diharapkan untuk menyara kehidupannya dan keluarganya.
- v) Wanita yang ditinggalkan suami tanpa nafkah, Suami dipenjarakan kerana kes jenayah dan dadah.
- vi) Bersara dan tidak ada lagi pendapatan.

Jabatan Majlis Ugama Islam telah berusaha merancang, merekabentuk dan menjalankan pelbagai program dalam menangani golongan miskin untuk meningkatkan kemampuan golongan ini sehingga status ekonomi mereka dari segi ekonomi ke tahap yang lebih baik serta mengeluarkan mereka dari kemiskinan. Program bantuan pendayaan diri antara usaha yang dilakukan adalah memberikan bantuan produktif sebagai kaedah untuk membantu mendayakan asnaf yang miskin dan memerlukan dengan mendorong mereka untuk berdikari dan berusaha. Bantuan pendayaan diri tersebut adalah dalam bentuk pelaburan jangka panjang bagi setiap peserta, antara lain;²⁸

- i) Bantuan Kewangan Sekolah: Bantuan ini dalam bentuk pelaburan jangka panjang dan dapat menjamin masa depan individu untuk mendapatkan pekerjaan. Bantuan ini memastikan bahawa anak-anak asnaf mendapat pendidikan yang sama seperti anak-anak dari keluarga lain untuk mengelakkan tidak bersekolah kerana kesempitan hidup keluarga.
- ii) Bantuan Biasiswa: Iaitu pelaburan jangka panjang yang berkaitan dengan urusan pendidikan seperti pembayaran yuran sekolah, kemasukan ke Institusi Pengajian Tinggi, yuran kursus, yuran peperiksaan.
- iii) Bantuan Modal: Iaitu bantuan pembelian peralatan perniagaan yang dijalankan. Sebagai contoh; mesin jahit, alat pertanian, peralatan menangkap ikan, kapal, kenderaan dan sebagainya. Bantuan ini diberikan kepada pemohon yang berminat untuk memulakan dan memulakan perniagaan, supaya mereka dapat berdikari dan pada masa yang sama membantu meningkatkan ekonomi keluarga.
- iv) Program Latihan, Kemahiran dan Bimbingan: Pada tahun 2007, program pemberdayaan diperkenalkan sebagai Program Pengupayaan Asnaf Zakat (PROPAZ). Program produktif ini dilaksanakan dengan peruntukan dana zakat dan berorientasikan ke arah pemerolehan

kemahiran pengetahuan melalui latihan dan bimbingan khusus untuk asnaf fakir.

Program Pengupayaan Asnaf Zakat (PROPAZ)

Dalam usaha menangani masalah kemiskinan dan pembangunan manusia di kalangan asnaf zakat, agensi Kerajaan dan bukan Kerajaan bersama dengan Kementerian Hal Ehwal Ugama melalui Jabatan Majlis Ugama Islam telah membuat kesepakatan untuk turut sama mengadakan inisiatif sama ada untuk menyalurkan bantuan yang berbentuk material untuk sara diri fakir miskin mahupun yang berupa program-program produktif untuk mengupayakan diri asnaf. Selaras dengan hasrat Kebawah Duli Yang Maha Mulia Paduka Seri Baginda Sultan Dan Yang Di-Pertuan Negara Brunei Darussalam, sebagai ketua ugama Islam di negara ini baginda mahukan rakyat mempunyai kehidupan yang seimbang dan berkualiti selaras dengan Wawasan Negara 2035.

PROPAZ ditadbir di bawah Bahagian Kutipan dan Agihan Zakat, Jabatan Majlis Ugama Islam dan dikendalikan oleh Urusetia. Peserta Sasaran bagi Program ini ialah penerima bantuan wang zakat dari asnaf fakir dan miskin yang berdaftar dan berkelayakan. Ini termasuk penerima bantuan sendiri, tanggungan penerima (isteri dan anak-anak) dan anak-anak di bawah jagaan penerima. Umur kelayakan peserta adalah dalam lingkungan umur 18 hingga 45 tahun.²⁹

Program pengupayaan dilaksanakan ini sangat tertumpu kepada tiga aspek utama iaitu; pembangunan sosial, keugamaan dan ekonomi. Objektif program ini diadakan adalah untuk mengubah pemikiran peserta ke arah meningkatkan taraf hidup yang lebih baik. Program ini juga ingin melahirkan belia-belia yang berkemahiran teknikal dan juga vokasional. Dengan kemahiran yang ada dapat memberikan peluang pekerjaan yang lebih cerah malah dapat mewujudkan usahawan kecil dan sederhana.³⁰

Jenis-jenis program pengupayaan yang dilaksanakan di bawah PROPAZ;^{31 32}

- i) PROPAZ Pusat Pembangunan Belia (PBB): Program ini lebih menjurus untuk memperoleh pengetahuan kemahiran melalui latihan teknikal

²⁹ Kementerian Hal Ehwal Ugama. (2016). *PROPAZ Ke Arah Pembasmian Kemiskinan*. Brunei Darussalam: Bahagian Perhubungan Awam, Kementerian Hal Ehwal Ugama.

³⁰ Program Pengupayaan Asnaf Zakat (kertas kerja Jabatan Majlis Ugama Islam). Sempena Sambutan Bulan Zakat Kebangsaan dan Seminar Pembangunan Asnaf Serantau 2017.

³¹ Ibid.

³² Sumber dari MUIB, Kementerian Hal Ehwal Ugama.

²⁸ Sumber dari MUIB, Kementerian Hal Ehwal Ugama.

dan vokasional serta bimbingan pembangunan diri seperti Kursus Latihan Kemahiran Masakan dan Katering dan Pembuatan Kek dan Pastri, Latihan Kemahiran Plumbing / Pipe Fitting dan Air Conditioning / Refrigeration, Latihan Kemahiran Komputer dan Pengendalian Pejabat, Kemahiran Solekan / Dandan Rambut, Latihan Kemahiran Sulaman / Jahitan Asas, Latihan Kemahiran *Welding / Vehicle Body Repair* dan sebagainya. Program dilaksanakan selama 9 bulan, iaitu latihan kemahiran selama 6 bulan di Pusat Pembangunan Belia, Kementerian Kebudayaan Belia dan Sukan dan menjalani latihan selama 3 bulan di Syarikat Swasta. Taraf latihan di Pusat Pembangunan Belia adalah di peringkat Persijilan City & Guilds.

- ii) PROPAZ Perantis: Program Perantis merupakan salah satu cabang program pengupayaan untuk membantu golongan fakir dan miskin meningkatkan taraf hidup mereka dengan mendapatkan latihan dan kemahiran melalui pelbagai bidang pekerjaan bersesuaian dengan keperluan pasaran. Program 2 tahun ini mendedahkan dan membimbing para peserta mengenai asas-asas kerja, kefahaman berhubung budaya dan etika kerja melalui latihan kemahiran dan penempatan-penempatan kerja (*apprentice*) di syarikat-syarikat swasta. Penempatan kerja ini dibiayai sepenuhnya melalui peruntukan wang zakat, manakala dalam tempoh percubaan bekerja, bayaran gajinya akan dikongsi sama melalui peruntukan wang zakat dan syarikat.
- iii) PROPAZ Keusahawanan: Program ini khusus bagi lepasan mana-mana peserta program PPB (Pusat Pembangunan Belia) atau Perantis yang berminat dalam bidang keusahawanan untuk menjalankan perusahaan. Sumber modal adalah melalui zakat Majlis Ugama Islam mengikut kesesuaian yang selayaknya, sekurang-kurangnya membantu para peniaga yang telah memulakan perniagaan secara kecil-kecilan. Program ini merupakan kerjasama dengan Kementerian Perindustrian dan Sumber-Sumber Utama.
- iv) PROPAZ Pembangunan Diri: Program pembangunan diri ini lebih menjurus kepada memberikan motivasi, kursus-kursus pembangunan diri kepada golongan fakir miskin bagi meningkatkan kesedaran untuk mengubah taraf kehidupan, berdaya tahan, sentiasa berusaha, ke arah menuju kehidupan yang lebih baik dan sempurna. Aktiviti-aktiviti yang dilaksanakan adalah seperti seminar, bengkel, halaqah dan sebagainya.
- v) Program-Program Sokongan: Penubuhan Koperasi Pengupayaan Kementerian Hal Ehwal Ugama Berhad (KOPA KHEUB) di mana tujuan

koperasi ini ditubuhkan antaranya adalah sebagai agensi utama untuk membantu lepasan PROPAZ dan menjadi saluran untuk mereka memajukan perniagaan dan perusahaan, atau menjadi tenaga kerja di dalam koperasi.

- vi) Program Az-Zira'ah (*Agripreneur*): Program yang baru dimulakan iaitu skim pengupayaan asnaf zakat menerusi latihan kemahiran pertanian. Program selama 15 bulan ini bertujuan untuk membantu penerima zakat untuk memperbaiki kehidupan mereka dengan menyediakan latihan kemahiran, pembangunan diri supaya mereka dapat menjana pendapatan bagi diri mereka dan tanggungan mereka. Jabatan Pertanian telah memberikan sebidang tanah di Mukim Kilanas bagi peserta PROPAZ Az-Zira'ah menjalani latihan kemahiran menanam lada, jagung manis dan sayur-sayur jenis kobis. Selain belajar menanam, mereka juga didedahkan dengan ilmu pemasaran produk masing-masing.³³

Agenda pembangunan sosio-ekonomi untuk golongan tidak berkemampuan merupakan salah satu usaha berterusan yang sangat memerlukan kerjasama semua pihak termasuk kerajaan atau swasta serta Badan-badan bukan kerajaan (NGO) dalam memastikan program yang dirancang berjaya dilaksanakan. Penglibatan melalui kerjasama yang diadakan dapat menandai hasrat kerajaan untuk mencapai kehidupan rakyat yang sejahtera dan harmoni. Melalui peluang yang diberikan, dapat membentuk serta menghasilkan asnaf zakat yang terlatih, berkeyakinan dan berilmu pengetahuan selaras dengan kemajuan industri asing dan seterusnya akan keluar daripada lingkaran kemiskinan. Kejayaan peserta-peserta nanti akan menjadi ikon kepada asnaf zakat yang lain agar mereka terus berdaya saing dalam memajukan diri untuk memastikan kehidupan yang stabil dan sejahtera.

Keberkesanan Program Pengupayaan Asnaf Zakat (PROPAZ) membantu asnaf zakat

Kemiskinan merupakan fenomena global termasuk di kalangan negara maju. Negara Brunei Darussalam, walaupun jumlah golongan miskin agak kecil, namun tidak patut dibiarkan sahaja. Usaha pembasmian kemiskinan dalam masyarakat Brunei melalui Program Pengupayaan Asnaf Zakat (PROPAZ) telah menampakkan kesan yang positif untuk membawa keluar golongan miskin daripada cengkaman dan lingkaran yang menghalang mereka daripada

³³ Teks ucapan Yang Berhormat Pehin Udana Khatib Dato Paduka Seri Setia Ustaz Haji Awang Badaruddin bin Pengarah Dato Paduka Haji Awang Othman, Menteri Hal Ehwal Ugama. 2019. Majlis Penyampaian Tauliah Amil 1440/2019.

menikmati kesejahteraan hidup. Amat membanggakan apabila para peserta yang mengikuti PROPAZ ini memiliki tahap pengetahuan dan kemahiran yang melayakkan mereka untuk mendapat pekerjaan di sektor swasta atau kerajaan. Malah ada yang sangat berkeyakinan untuk memulakan bisnes biar pun secara kecil-kecilan. Menepati pepatah 'sikit-sikit lama-lama menjadi bukit', bisnes amat sesuai bagi mereka untuk berusaha sendiri mengubah kehidupan.

Sepanjang program PROPAZ ini dijalankan bermula dari tahun 2008-2013 dari sesi pertama hingga sesi keenam, beberapa pencapaian telah dicapai³⁴ seperti berikut:

i. Bagi program PROPAZ PPB (Pusat Pembangunan Belia), jumlah peserta pada awal program ini dijalankan, iaitu pada tahun 2008 terdapat 18 orang peserta, tahun 2009 seramai 25 orang peserta, tahun 2010 seramai 40 orang peserta, tahun 2011 seramai 29 orang peserta, 2012 seramai 14 orang peserta dan tahun 2013 seramai 21 orang peserta. Sepanjang tempoh tersebut sebanyak 75.5 peratus telah berjaya menamatkan kursus dan bekerja di jabatan kerajaan atau sektor swasta dan berniaga.

ii. Program PROPAZ - PERANTIS: Program ini mula diperkenalkan pada tahun 2012 dengan penyertaan seramai 55 peserta iaitu 32 orang pada sesi pengambilan pertama dan 23 orang pada sesi pengambilan kedua. 50.9 peratus telah berjaya dalam program ini dan telah mendapat tawaran pekerjaan dengan kerajaan atau bekerja di sektor swasta atau berniaga.

Menurut Mantan Timbalan Menteri Hal Ehwal Ugama, Yang Mulia Dato Paduka Awang Haji Abdul Mokti bin Haji Mohd. Daud,³⁵ bahawa semenjak PROPAZ dikendalikan ia mampu memberikan kesan positif yang diukur melalui pencapaian baik dari para peserta lepasan program dan ini adalah satu peningkatan baik yang telah dicapai dari aspek kemahiran diri, keagamaan mahupun ekonomi.

Menurut Menteri Hal Ehwal Ugama, Yang Berhormat Pehin Udana Khatib Dato Paduka Seri Setia Ustaz Haji Awang Badaruddin bin Pengarah Dato Paduka Haji Awang Othman berkata dalam ucapan mukadimah ketika membincangkan Belanjawan Kementerian Hal Ehwal Ugama di Mesyuarat Pertama dari Musim Permesyuaratan Ke-14 (2018) Majlis Mesyuarat Negara (MMN), bahawa terdapat tanda-tanda yang positif apabila sebilangan daripada peserta atau keluarga mereka perlahan-lahan berdikari untuk seterusnya terkeluar dari lingkaran

³⁴ Pelita Brunei. "Tingkatkan taraf hidup, jangan bergantung sepenuhnya kepada zakat" sempena Majlis Muzakah Kementerian Hal Ehwal Ugama(KHEU) 31 Januari 2015.

³⁵ Sempena Majlis Penyampaian Sijil Peserta PROPAZ kali ke 8 sesi tahun 2015-2016.

kemiskinan atau daripada Asnaf Fakir Miskin itu. Ada yang dari kecil mengusahakan produk makanan secara kecil-kecilan berniaga kemudian akhirnya meningkat sehingga menjadi sebagai pembekal (*caterer*). Mereka itu telah dijadikan contoh oleh KHEU dan telah dihantar ke luar negeri dalam satu seminar yang menghendaki untuk menunjukkan kejayaan Asnaf Fakir Miskin di Brunei sebagai contoh.

Bagi meningkatkan lagi kualiti hidup asnaf fakir dan miskin di Negara Brunei Darussalam, program telah dilaksanakan oleh Majlis Ugama Islam Brunei ialah Program Az-Zira'ah Agripreneur. Az-Zira'ah adalah program yang memberi peluang kepada penerima zakat bersama keluarga mereka untuk belajar asas-asas dalam bidang pertanian dan bagaimana ia dapat menjana pendapatan dari kerja keras mereka sendiri.

Latihan diberikan bagi mereka yang masih belum bekerja dan masih belum memperoleh pendapatan serta mereka yang berminat untuk meneroka bidang pertanian dan komited dalam meningkatkan diri mereka untuk menjadi yang lebih baik. Program dilaksanakan di kawasan seluas 1.1 hektar di Pusat Penyelidikan Pertanian Brunei (BARC).³⁶

Di bawah program PROPAZ, para peserta akan menjalani beberapa latihan termasuk mempelajari konsep asas pertanian dengan mentor. Di bawah program ini, para peserta akan menjalani beberapa latihan termasuk yang dikendalikan oleh Jabatan Pertanian dan Agrimakanan, untuk mempelajari konsep asas pertanian dengan mentor yang dilantik, mewujudkan rangkaian perniagaan baik dengan sektor kerajaan dan swasta, belajar bagaimana untuk menjadi agripreneur yang berjaya dan mahir, untuk mengatasi masalah perniagaan melalui rangkaian sedia ada dan pada akhirnya mereka akan menjadi model peranan yang berjaya untuk program PROPAZ.

Untuk program ini, kedua-dua pertanian jenis hidroponik dan pertanian konvensional akan digunakan, manakala itu, sekretariat PROPAZ telah memutuskan bahawa program itu akan menggunakan pelbagai jenis penanaman sebagai modul utama mereka termasuk sayur-sayuran hijau, jagung, cili dan cendawan jenis tiram.³⁷

Program Az-Zira'ah ini dari awal pengendaliannya menunjukkan pelbagai kesan/hasil yang positif. Pada

³⁶ Teks ucapan Yang Berhormat Pehin Udana Khatib Dato Paduka Seri Setia Ustaz Haji Awang Badaruddin bin Pengarah Dato Paduka Haji Awang Othman, Menteri Hal Ehwal Ugama. 2019. Majlis Penyampaian Tauliah Amil 1440/2019.

³⁷ Teks ucapan Yang Berhormat Pehin Udana Khatib Dato Paduka Seri Setia Ustaz Haji Awang Badaruddin bin Pengarah Dato Paduka Haji Awang Othman, Menteri Hal Ehwal Ugama. 2019. Majlis Penyampaian Tauliah Amil 1440/2019.

tahun 2017 hasil keseluruhan pengeluaran padi bagi salah satu kawasan pengusahaan ladang padi adalah sebanyak 1,069 tan metrik dengan nilai BND1.71 juta, manakala terdapat di kawasan perusahaan ladang padi yang lain mengeluarkan 387 tan metrik dengan nilai BND0.62 juta.³⁸

Salah sebuah perusahaan di bawah program ini yang mula memajukan ladang pada tahun 2000, melakukan aktiviti pertanian secara konvensional dan sistematik bagi mengeluarkan hasil tanaman sayur-sayuran yang tinggi. Ladang ini telah menghasilkan sebanyak 459 tan metrik dengan nilai BND1.36 juta pada tahun 2016 dan pada tahun 2017 mampu meningkatkan hasil sebanyak 496 tan metrik bernilai BND1.38 juta.³⁹

Terdapat perusahaan yang menanam sayur-sayuran menggunakan sistem rumah terlindung (Green house), Hidroponik dan sistem Bertingkat (*Vertikal Farming*) yang telah mula bergiat pada akhir tahun 2017 dan mula mengeluarkan hasil pada tahun 2018. Ladang ini menghasilkan sebanyak satu tan metrik sayur-sayuran yang bernilai BND6,093.

Selain dari kemajuan yang baik dari petanian penanaman, program dalam bidang penternakan juga turut menampakkan perkembangan yang positif dan progresif. Salah sebuah perusahaan PROPAZ pada asalnya hanya memiliki dua buah reban di awal penubuhannya pada 2014, kini memiliki sepuluh reban yang beroperasi sepenuhnya. Perusahaan ini menggunakan teknologi sistem reban ayam tertutup bagi reban yang berkapasiti 3,500 ekor ayam dan reban berkapasiti 20,000 hingga 23,000 ekor ayam setiap pusingan. Hasil dari pengeluaran ayam pedaging ini juga semakin tinggi dari tahun ke tahun.⁴⁰

Oleh itu, program agripreneur yang dinamik ini akan menjadi salah satu daripada inisiatif pembudayaan yang dilaksanakan mengikut keperluan semasa dan menggalakkan golongan asnaf untuk menjalankan perniagaan terutamanya dalam bidang pertanian.

Program PROPAZ ini juga diperkatakan ketika Majlis Mesyuarat Negara (MMN) iaitu Belanjawan Kementerian Hal Ehwal Ugama dari Musim Permesyuaratan Ke-15 (2019)⁴¹ yang mana program

ini menampakkan hasil yang sangat positif dan membina semangat para peserta yang terdiri dari beberapa asnaf.

Hasil yang boleh diperolehi dari tahun ke setahun menunjukkan bahawa program ini boleh bergerak dan berkembang lebih jauh. Dari penelitian hasil-hasil yang dicapai oleh para peserta asnaf PROPAZ sememangnya menunjukkan bahawa program ini boleh berjaya dan berkembang lebih jauh serta boleh menyuntik lebih lagi semangat para asnaf untuk belajar serta berupaya memahirkan diri kemudian boleh mengeluarkan mereka dari kepompong kemiskinan. Meskipun program ini belum mampu memasukkan kesemua asnaf untuk menjadi peserta, namun sekurang-kurangnya ianya boleh mengurangkan dari jumlah asnaf yang memerlukan bantuan.

Apa yang diharapkan, wang zakat yang menjadi biaya latihan seumpama ini akan terus membuahkan hasil. Justeru itu, peserta-peserta akan dapat membebaskan diri mereka dari kemiskinan dengan menceburi bidang keusahawanan atau mendapat pekerjaan di mana-mana syarikat swasta atau pejabat-pejabat Kerajaan.

Penutup

Terdapat lapan asnaf yang wajib dan berhak diberikan zakat⁴² dan mengembangkan zakat adalah langkah yang baik sebagai kaedah untuk mengoptimumkan zakat. Selain pengagihan harta zakat secara konsumtif, zakat dapat diagihkan secara produktif iaitu memberikan zakat kepada fakir miskin dalam bentuk modal usaha, atau berbentuk alat-alat untuk usaha yang dapat mereka gunakan sebagai sumber mata pencarian.

Pendayagunaan harta zakat secara produktif dibenarkan dalam hukum Islam, usaha pengurus/pengelola dalam memanfaatkan hasil kutipan zakat kepada sasaran yang sesuai dengan *syara'*, sistem pengagihan yang mempunyai faedah yang berkesan serta produktif dengan tujuan sosial ekonomi dari zakat. Pengurus/pengelola zakat perlulah jujur, pintar, amanah dalam menjalankan zakat serta mempunyai pengurusan yang baik dan profesional dalam menjayakan program yang dijalankan.

PROPAZ hanyalah pengendali yang membuka jalan, menyediakan latihan kemahiran praktikal untuk kepentingan setiap peserta dan menjadikannya kekuatan untuk menjalani kehidupan ke arah yang lebih baik. Oleh itu, penglibatan Majlis Ugama Islam Brunei (MUIB) melalui Urus Setia Program PROPAZ

³⁸ 9 September 2018. Lawatan dari rombongan Pembangunan Belia dan Sukan, Kementerian Kebudayaan, Belia dan Sukan (KKBS) dan Program Pengupayaan Asnaf Zakat (PROPAZ), Jabatan Majlis Ugama Islam Brunei (MUIB), Kementerian Hal Ehwal Ugama.

³⁹ Ibid.

⁴⁰ 9 September 2018. Lawatan dari rombongan Pembangunan Belia dan Sukan, Kementerian Kebudayaan, Belia dan Sukan (KKBS) dan Program Pengupayaan Asnaf Zakat (PROPAZ), Jabatan Majlis Ugama Islam Brunei (MUIB), Kementerian Hal Ehwal Ugama.

⁴¹ Siaran Akhbar. Sesi Lawatan Bagi yang berhormat Ahli-ahli Majlis Mesyuarat Negara ke Tapak-Tapak Perusahaan

Pertanian, Kementerian Sumber-Sumber Utama dan Pelancongan di Daerah Brunei Muara. (26 Januari 2019)

⁴² At-Taubah. 09:60.

serta badan kerajaan lain, swasta dan NGO boleh menjadi model kepada program intervensi pembasmian kemiskinan supaya keluarga miskin tidak terus terperangkap dalam kitaran ganas kemiskinan. Jika ibu bapa, anak dan cucu dari keluarga miskin ini tidak dapat keluar dari belenggu kemiskinan, besar kemungkinan generasi akan datang akan terus berada dalam kedaifan.

Secara keseluruhan, objektif utama kajian ini adalah untuk melihat keberkesanan program kaedah PROPAZ dalam mengurangkan kemiskinan di kalangan asnaf. Sesungguhnya program ini sangat berjaya, dari tahun ke tahun menunjukkan kemajuan yang positif. Peserta dari kumpulan asnaf nampaknya lebih berpendidikan, berkemahiran malah mempunyai masa depan yang cerah. Pada masa yang sama program ini dapat membantu meningkatkan ekonomi kemudian mengurangkan kemiskinan dan kemudian membasmi ke sifar.

Walaupun pengagihannya tidak menjadikan mereka terutama golongan miskin menjadi kaya, tetapi ianya dianggap cukup untuk menampung perbelanjaan kehidupan seharian mereka. Sehubungan dengan itu, diharap orang miskin tidak merasa kecewa, sedih atau kecewa dengan kehidupan, bahkan cabaran harus ditempuhi untuk meningkatkan taraf hidup dari semasa ke semasa. Serta jangan bergantung sepenuhnya pada zakat yang diterima. Perlu ada usaha untuk meningkatkan taraf hidup seseorang.

Rujukan

Ade Mulya. (2020). *Strategi Pendayagunaan Zakat Produktif*. Indonesia. UIN Sultan Maulana Hasanuddin Banten. Hlm: 3.

Amir Syarifudin (2003), *Garis-garis Besar Fiqih*. Jakarta: Kencana.

Asnaini (2008), *Zakat Produktif Dalam Perspektif Hukum Islam.*, Yogyakarta:Pustaka Pelajar.

Ataul-Haq, Pramanik (1993), *Development and Distribution in Islam*. Petaling Jaya: Pelanduk Publications.

Didin Hafidhuddin (2002), *Zakat Dalam Perekonomian Modern*. Jakarta: Gema Insani.

Dr. Abdul Nasir bin Haji Abdul Rani (2012), *Wacana Pemangkin Ekonomi Ummah*. Perpustakaan Dewan Bahasa dan Pustaka Brunei.

Iqbal M. Khan (2014). *Vocational Education and Zakat: The Case Study of Punjab Vocational*

Training Council. Journal of Higher Education and Science.

Joyce M. Hawkins (1996), *Kamus Dwi Bahasa Inggris Indonesia, Indonesia-Inggris*, Exford: Erlangga.

K.H A Safradii. (2018), *Zakat Konsumtif dan Zakat Produktif Analisis Fikih Kontemporer*.

M. Ali Hasan (2008), *Zakat dan Infak: Salah Satu Solusi Mengatasi Problema Sosial di Indonesia*. Jakarta: Kencana

Majlis Ugama Islam Brunei (2004) *Garis Panduan Tugas dan Tanggungjawab Amil. Bandar Seri Begawan: Kementerian Hal Ehwal Ugama Negara Brunei Darussalam*.

Noeng Muhadjir (1996), *Metodologi Penelitian Kualitatif*, III edition. Yogyakarta: Rakesarasin.

Yusoff, Mohammed (2011), *Zakat expenditure, school enrollment, and economic growth in Malaysia*. *International Journal of Business and Social Science*.

Yusuf Qadhawi (1966), *Musykilah al-Faqr Wakaiifa Aalajaha Al Islam: Beirut*.

Pelita Brunei. "Penyelidikan Komprehensif garis kemiskinan perlu dilaksanakan" (author: Wan Mohammad Sahran Wan Ahmadi) 12 November 2015.

Majlis Ugama Islam. (2019). *Briefing on the Management and Administration of Zakat and Waqf in Brunei Darussalam*.

Asnaf Zakat Empowerment Program (Working paper of the Islamic Religious Council Department). In conjunction with the National Zakat Month Celebration and Regional Asnaf Development Seminar 2017.

Sumber dari MUIB, Kementerian Hal Ehwal Ugama.